

南無華嚴會上佛菩薩（三稱）

大方廣佛華嚴經入不思議解脫境界普賢行願品卷第三十一  
爾時，善財順知識教，遂即往詣三十三天，具足正念天王宮  
中，見彼天女，禮足圍遶，合掌前住。白言：「聖者！我已  
先發阿耨多羅三藐三菩提心，而未知菩薩云何學菩薩行？云  
何修菩薩道？我聞聖者善能誘誨，願為我說。」

天女告言：「善男子！我得菩薩無礙念清淨莊嚴解脫門。」

善財白言：「聖者！此解脫門境界云何？修行何法得此解脫  
？」

天女答言：「善男子！菩薩勤修無量不思議法門，得此解脫  
。汝若欲入此解脫門，亦當如是精勤修學。云何勤修不思議  
法門？所謂：汝應勤修不可思議諸法義智；謂：如實覺悟一  
切諸法，差別性相，真實體故。汝應勤修守護正法；謂：種  
種妙法為人誹謗，以理摧伏，顯勝義故。汝應勤修表無表戒  
；謂：若性若遮，有罪無罪，微細觀察，無缺減故。汝應勤  
修無諍訟法；謂：世間種種綺雜言說，無益集會，常遠離故  
。汝應勤修住安忍地；謂：種種苦惱逼迫身心，審諦觀察，  
能忍受故。汝應勤修忍耐諸境；謂：惡言毀辱，怨結毒害，  
不壞內心，常安忍故。汝應勤修解微細法；謂：知蘊、界、  
處流轉還滅，善了性相不可得故。」

汝應勤修善巧法句；謂：巧能宣說種種法門，真實性相令顯現故。汝應勤修合不合法；謂：了知諸法性不可奪，亦無增減離合等故。汝應勤修觀過去智；謂：微細觀察種種業因，善惡等相，無不知故。汝應勤修未來際智；謂：微細觀察種種業緣果報等相，無不知故。汝應勤修三世平等；謂：三世行相雖各不同，但隨住法有差別故。汝應勤修三輪清淨；謂：過、現、未來一切諸法，性不可得，離心意故。汝應勤修心住處法；謂：普徧了知內、外、中間，心相本性，不可得故。汝應勤修守護威儀；謂：一切時中，微細觀察身、口、意業，不迷惑故。汝應勤修清淨威儀；謂：密護根門藏覆善法，所有不善，恆發露故。

汝應勤修離不善法；謂：愚癡凡夫種種惡法，不與共住，常覺悟故。汝應勤修習菩薩行；謂：普徧了知勇猛精進，難行能行，種種行故。汝應勤修恭敬尊長；謂：床座供具，給侍奉迎，身心謙下無懈怠故。汝應勤修攝持身心；謂：普能攝持諸清淨法，不失不壞常了知故。汝應勤修隨順覺智；謂：於諸世間、出世間法，隨順性相而覺悟故。汝應勤修入甚深法；謂：了達一切生滅法相，令心增長無生智故。汝應勤修音聲法智；謂：如實演說種種法門，開示語言真實性故。

汝應勤修遠離無益；謂：以諸方便，令自及他，超過諸有，無益法故。汝應勤修丈夫集會；謂：諸佛、菩薩、聲聞、獨

覺，親近承事，常供養故。汝應勤修遠惡知識；謂：遠離樂起斷常諸見，及懶惰等惡眾生故。汝應勤修不依凡夫；謂：見凡夫法，皆與愚癡而共相應，多過失故。汝應勤修常不輕心；謂：於諸眾生了性平等，不於貧下生輕賤故。汝應勤修愍破戒者；謂：以大慈悲拔濟犯罪，安置菩薩淨戒中故。汝應勤修增慈悲力；謂：觀察十方三世眾生種種逼迫，能救護故。

汝應勤修財法攝受；謂：財物、飲食攝諸眾生，令入甚深真實法故。汝應勤修如說能行；謂：修種種善，開發自心，具足敷榮得圓滿故。汝應勤修以相應善；謂：求宿住智善巧多聞，能知過去相應行故。汝應勤修樂獨善寂；謂：遠離處眾諸雜談說，常樂親近白淨法故。汝應勤修少欲知足；謂：衣服、飲食、臥具、醫藥，自作教他知止足故。汝應勤修相應行法；謂：三十七品菩提分法，常勤修習令相應故。汝應勤修菩薩行境；謂：十波羅蜜一切行門，具足修習令圓滿故。汝應勤修菩薩地法；謂：十種智地入住及出，相及得果，皆證知故。汝應勤修入如來地；謂：若菩提智，及所斷障種種體用，皆證得故。汝應勤修難了知法；謂：諸佛、菩薩、獨覺、聲聞，皆悉了知不思議故。汝應勤修不取諸相；謂：修習覺悟諸法性相，如幻如夢同實相故。汝應勤修解脫法智；謂：金剛三昧散壞塵習，澄靜妄念智不動故。

善男子！有如是等佛剎極微塵數不可思議種種法門，我皆勤修得此解脫，汝能修行亦當證得。善男子！汝向所問解脫境界，我此解脫境界無邊。又善男子！我以得此解脫力故，憶念古世，爾時有劫，名：優鉢羅華，於彼劫中，承事供養恆河沙數諸佛如來。彼諸如來，從初出家，我皆瞻奉守護供養，造僧伽藍營辦資具。又彼如來，從為菩薩入母胎時，誕生之時，行七步時，師子吼時，童子位時，處宮中時，厭棄王位初出家時，詣菩提樹成正覺時，轉正法輪現佛神變，教化調伏諸眾生時。如是一切諸所作事，從初發心，行菩薩道，乃至法盡，我皆明記無有遺餘，常現在前念持不忘。又憶過去，劫名：善地，我於彼劫，復得值遇十恆河沙諸佛如來，承事供養。復憶有劫，名為：妙德，於彼值遇十佛世界極微塵數諸佛如來，承事供養。又憶往劫，名：無所得，於彼值遇八十百千億那由他諸佛如來，承事供養。復憶有劫，名為：妙光，於彼值遇閻浮提極微塵數諸佛如來，承事供養。復憶往劫，名：無稱光，於彼值遇二十恆河沙諸佛如來，承事供養。復憶往劫，名：最勝吉祥，於彼值遇一恆河沙諸佛如來，承事供養。復憶往劫，名：出現日，於彼值遇八十恆河沙諸佛如來，承事供養。復憶往劫，名：勝性遊行，於彼值遇六十恆河沙諸佛如來，承事供養。復憶有劫，名為：妙月，於彼值遇七十恆河沙諸佛如來，承事供養。善男子！如是憶念恆河沙劫，我常不離諸佛如來，應、正等覺，種種方便恭敬供養，從彼一切諸如來所，皆得聞此無礙念清淨莊嚴菩

薩解脫，聞已受持，如說修行恆不忘失。如是往劫所有如來，從初發心，乃至法盡諸所作事，我皆以此清淨莊嚴解脫之力，隨順憶念明了現前，持而順行，念念觀察曾無懈廢。

善男子！我唯知此無礙念清淨莊嚴菩薩解脫，如諸菩薩摩訶薩，出生死夜朗然明徹，永離癡冥未嘗昏寐，心無諸蓋，身行輕安，於諸法性清淨覺了，決擇甚深修多羅藏，了不了義一切難處，善護自他，常勤修習菩薩淨戒，若利非利心恆平等，善巧出生神通妙智，隨順世間種種方便，增長福慧心無厭足，起大精進勤修助道，積集慈悲心無厭倦，成就如來十力無畏、十八不共、一切佛法，隨順開悟，一切眾生，晝夜精勤更無餘念。而我云何能知、能說彼功德行？善男子！此迦毗羅城，有童子師，名為：遍友。汝詣彼問，菩薩云何學菩薩行，修菩薩道。」

時，善財童子，以聞法故，歡喜踊躍，不思議善根速疾增長，頂禮其足，繞無數匝，慇懃瞻仰，辭退而去。

爾時，善財從天宮下，向迦毗羅城，詣遍友所，禮足右繞，合掌恭敬於一面立。白言：「聖者！我已先發阿耨多羅三藐三菩提心，而未知菩薩云何學菩薩行，云何修菩薩道，我聞聖者善能誘誨，願為我說。」

遍友答言：「善男子！此有童子，名：善知眾藝，修學菩薩字智法門。汝可問之，當為汝說。」

爾時，善財即至其所，頂禮其足，繞無數匝，於前合掌。白言：「聖者！我已先發阿耨多羅三藐三菩提心，而未知菩薩云何學菩薩行，云何修菩薩道，我聞聖者善能誘誨，願為我說。」

時，彼童子告善財言：「善男子！我得菩薩解脫名具足圓滿，善知眾藝。我恆唱持此之字母，所謂：唱『婀』字時，能甚深入般若波羅蜜門，名：以菩薩勝威德力，顯示諸法本無生義。唱『囉』字時，能甚深入般若波羅蜜門，名：普遍顯示無邊際微細解。唱『跛』字時，能甚深入般若波羅蜜門，名：普照法界平等際微細智。唱『者』字時，能甚深入般若波羅蜜門，名：普輪能斷差別色。唱『曩』字時，能甚深入般若波羅蜜門，名：證得無依無住際。唱『擺』字時，能甚深入般若波羅蜜門，名：離名色依處無垢汙。唱『娜』字時，能甚深入般若波羅蜜門，名：不退轉方便。唱『婆』字時，能甚深入般若波羅蜜門，名：金剛輪道場。唱『拏』字時，能甚深入般若波羅蜜門，名：普圓滿輪。唱『灑』字時，能甚深入般若波羅蜜門，名為：海藏。唱『嚩』字時，能甚深入般若波羅蜜門，名：普遍勤求出生安住。唱『哆』字時，能甚深入般若波羅蜜門，名：星宿月圓滿光。唱『也』字

時，能甚深入般若波羅蜜門，名：差別積集。唱『瑟吒』字時，能甚深入般若波羅蜜門，名：普照光明息除煩惱。唱『迦』字時，能甚深入般若波羅蜜門，名：普雲不斷。唱『娑』字時，能甚深入般若波羅蜜門，名：降注大雨。唱『莽』字時，能甚深入般若波羅蜜門，名：大速疾現種種色如眾高峰。唱『誡』字時，能甚深入般若波羅蜜門，名：普輪積集。唱『他』字時，能甚深入般若波羅蜜門，名：真如平等無分別藏。唱『惹』字時，能甚深入般若波羅蜜門，名：遍入世間海遊行清淨。唱『娑嚩』字時，能甚深入般若波羅蜜門，名：普念諸佛一切莊嚴。唱『馱』字時，能甚深入般若波羅蜜門，名：微細觀察一切法聚。唱『捨』字時，能甚深入般若波羅蜜門，名：隨順諸佛教輪光明。唱『佉』字時，能甚深入般若波羅蜜門，名：因地現前智慧藏。唱『乞叉』字時，能甚深入般若波羅蜜門，名：息諸業海出生智慧藏。唱『娑哆』字時，能甚深入般若波羅蜜門，名：開淨光明蠲諸惑障。唱『孃』字時，能甚深入般若波羅蜜門，名：出離世間智慧門。唱『曷囉他』字時，能甚深入般若波羅蜜門，名：利益眾生無我無人智慧燈。唱『婆』字時，能甚深入般若波羅蜜門，名：圓滿莊嚴一切宮殿。唱『車』字時，能甚深入般若波羅蜜門，名：增長修行方便藏普覆輪。唱『娑麼』字時，能甚深入般若波羅蜜門，名：隨順十方現見諸佛旋轉藏。唱『訶嚩』字時，能甚深入般若波羅蜜門，名：觀察一切微細眾生方便力出生海藏。唱『哆娑』字時，能甚深入般

若波羅蜜門，名：自在趣入諸功德海。唱『伽』字時，能甚深入般若波羅蜜門，名：普持一切法雲堅固海藏。唱『姪』字時，能甚深入般若波羅蜜門，名：願力現見十方諸佛猶如虛空。唱『儻』字時，能甚深入般若波羅蜜門，名：入字輪際無盡境界。唱『頗』字時，能甚深入般若波羅蜜門，名：教化眾生究竟圓滿處。唱『娑迦』字時，能甚深入般若波羅蜜門，名：廣大藏無礙辯遍照光明輪。唱『夷娑』字時，能甚深入般若波羅蜜門，名：演說一切佛法智。唱『室者』字時，能甚深入般若波羅蜜門，名：入虛空一切眾生界法雷大音遍吼。唱『佉』字時，能甚深入般若波羅蜜門，名：說無我法開佛境界曉悟群生。唱『荼』字時，能甚深入般若波羅蜜門，名：一切法輪差別藏。

善男子！我唱如是字母之時，此四十二般若波羅蜜門為首，一切章句隨轉無礙，能甚深入無量無數般若波羅蜜門。」

善財白言：「聖者！云何修行得此解脫？」

答言：「善男子！若諸菩薩勤修十法，具足圓滿，則能得此善知眾藝菩薩解脫。何等為十？所謂：具足智慧，勤求善友，勇猛精進，離諸障惑，正得清淨，尊重正教，觀法性空，滅除邪見，修習正道，具真實智。若諸菩薩於此十法具足圓滿，則能速疾得此解脫。所以者何？由諸菩薩具足智慧勤求



善友，見已親近，歡喜愛敬生如佛想。以親近故常蒙教誨，蒙教誨故，則能難行勇猛精進；得精進已，能以善法滅諸不善；滅不善故，令眾善法皆得圓滿；善圓滿已，則能遠離一切障惑；離諸障故，令身、口、意得大清淨，正行相應；由此清淨，能於一切諸佛菩薩善知識教，心生尊重；尊重教故，勤求觀察諸法空寂；悟法空已，其心所向皆無罣礙，深達緣起，離無因見，滅邪見心，修習正道；入正道已，得真實智；得實智故，得此解脫，證深法界。」

善財復言：「此真實者，名為何等？」

答言：「善男子！即此語言，是名真實。」

善財復言：「云何語言，名為真實？」

答言：「善男子！不虛誑語，是名真實。」

復言：「云何不虛誑語？」

眾藝答言：「彼語真實，體常不變，恆一性故。」

復言：「云何不變異性？」

答言：「善男子！自身證悟，解法性故。」

復言：「法性相貌云何？能所解法為一、為二？」

答言：「善男子！如是菩薩自所證法，不一不二。由此力故則能平等利益自他，猶如大地能生一切，而無彼此能所利心，然其法性亦非有相，亦非無相，體如虛空難知難解。

善男子！此法微妙，難以文字、語言宣說。何以故？超過一切文字境界故，超過一切語言境界故，超過一切語業所行諸境界故，超過一切戲論分別思量境界故，超過一切尋伺計度諸境界故，超過一切愚癡眾生所知境界故，超過一切煩惱相應魔事境界故，超過一切心識境界故，無此無彼、無相離相、超過一切虛妄境界故，住無住處寂靜聖者境界故。善男子！彼諸聖者，自證境界，無色相，無垢淨，無取捨，無濁亂，清淨最勝，性常不壞。諸佛出世，若不出世，於法界性體常一故。善男子！菩薩為此法故，行於無數難行之行，得此法體，善能饒益一切眾生，令諸眾生於此法中究竟安住。善男子！此是真實，此不異相，此是實際，此是一切智體，此是不思議法界，此是不二法界，此是善知眾藝圓滿，具足菩薩解脫。善男子！我唯知此解脫，如諸菩薩摩訶薩，能於一切世、出世間善巧之法，殊能異藝，文字算數，咸綜無遺。又善了知醫方咒術；有諸眾生、鬼魅所持，怨憎咒詛，妖幻

所迷，死屍奔逐，癩癩羸瘦，及諸蟲毒種種異疾，咸能救之使得痊愈。又善別知殊珍異貨；金、玉、珠、貝、珊瑚、瑠璃、摩尼、砗磲、玻瓈、碼碯、銅、鐵、鉛、錫、雞薩羅等，一切寶藏出生之處，品類不同，價值多少。村營國邑，大小都城，宮殿苑園，巖泉藪澤，凡是一切人眾所居，菩薩咸能隨方攝護。又知其身具有六百六十三相，於諸相中校其優劣，知其苦樂，定其吉凶，辨其修短。雖具眾相不及好聲，雖多好聲不如勝福，及知此福所修之業，可轉不轉定不定報。又善觀察天文地理，讖緯陰陽，人相吉凶惡星變怪，雲霞氣候，鳥獸音聲，水陸往還，徵應休咎，年穀豐儉，國土安危。如是世間所有藝能靡不該練，盡其源本。又能分別出世之法正名辯義，觀察體相微細甚深，決擇宣說隨順修行，智入其中無疑無礙，無愚闇，無頑鈍，無憂惱，無沉沒，無不現證。而我云何能知、能說彼功德行？善男子！此摩竭提國有一聚落，名為：有義。彼中有城，名：婆怛那，有優婆夷，名：最勝賢。汝詣彼問，菩薩云何學菩薩行，修菩薩道。

」

時，善財童子禮眾藝足，繞無數匝，慇懃瞻仰，一心戀慕，辭退而去。

大方廣佛華嚴經普賢行願品卷第三十一

離婆離婆帝 求訶求訶帝 陀羅尼帝 尼訶囉帝  
毗黎你帝 摩訶伽帝 真陵乾帝 娑婆訶 (七遍)

南無喝囉怛那 哆囉夜耶 佉囉佉囉  
俱住俱住 摩囉摩囉 虎囉 吽 賀賀  
蘇怛拏 吽 潑抹拏 娑婆訶 (三遍)

願以此功德 莊嚴佛淨土 上報四聖恩 下濟六凡苦  
所有法界眾 悉修菩提行 盡此一報身 同生極樂國